

# **Акафисты святому праведному Иоанну пресвитеру Кронштадтскому, чудотворцу**

## **Акафист первый**

### **Кондак 1**

Избранного и верного во иереех Божиих восхваляем тя, богоносне отче Иоанне! Ты бо Евангельской Истине последуя, Христу всем сердцем сораспялся еси, струю чудес и исцелений всем верным источаеши и ко спасению их направляеши. Мы же молитвами твоими в вере, надежде и любви укрепляеми, благодарне зовем ти: Радуйся, Иоанне, земли Российския молитвенниче предивный.

### **Икос 1**

Ангела молитвы и проповедника покаяния ведаем тя, блаженне отче. Ходатайствуеши бо за нас у Престола Божия, да в разум истинный приидем и жизнь свою на путь спасения направим, взывая тебе: Радуйся, благодати Божия сосуде избранный; Радуйся, Премудрость Божию, яко млеко матере, сладостно впитавый; Радуйся, Ангелу хранителю твоему, яко Товия древле, вседушевно последовавый; Радуйся, боголюбивых родителей целомудренный плод чистоты непререкаемый; Радуйся, в повиновении родителям своим благословение Божие стяжавый; Радуйся, от юности твоея водительству Духа Святаго прилежаый; Радуйся, всем сердцем твоим Бога возлюбивый; Радуйся, в меру возраста Христова Богомудренно возраставый; Радуйся, Иоанне, земли Российския молитвенниче предивный.

### **Кондак 2**

Предвидя, яко многия беды и соблазны грядут на Церковь Русскую и чада Божии в смятении будут, яко пастырь добрый, душу свою за паству свою готовый положить, глагола еси людям: "Убойтесь соблазнов, стойте в вере Православной, мужайтесь и крепитесь, и славьте Господа, взывая Ему: Аллилуиа".

### **Икос 2**

Разумом Божественным просвещаемый, богословия струи животочныя источил еси, всеблаженне отче Иоанне, в посте и молитве словеса Божия со слезами в сердца верных сея, к свету истиннаго Богопознания чад земли наша призывал еси. Тии же, в любви Божии

укрепляющеся, пояху тебе таковая: Радуйся, Евангельския Истины пламенный ревнителю; Радуйся, глаголов жизни вечныя неумолкаемый возвестителю; Радуйся, равноангельным житием твоим достойно украшенный; Радуйся, у Престола Божия о людях ходатаю верный; Радуйся, от юности Церкви Христовой всем сердцем прилепивыйся; Радуйся, Христу сораспятися о людях вседушевно возгоревыйся; Радуйся, любовью Христовою сердце твое, аки ниву благодатную, возделавый; Радуйся, людям, в скорбех и печалех изнемогшим, состраданием и молитвою облегчение подававший; Радуйся, Иоанне, земли Российския молитвенниче предивный.

### **Кондак 3**

Силою Божественная благодати, яко углем горящим у жертвенника Божия возжжен, светильниче многосветлый во граде Кронштадте просиял еси, отцев наших похвало, отче Иоанне. Сице бо во тьме греховней обураемых и соблазном богоборчества колеблемых зарею Божественнаго разума просветил еси и научил еси пети: Аллилуиа.

### **Икос 3**

Имея любовь велию людем, Кровию Сына Божия искупленным, потекл еси к неимущим благочестия, трезвения и страха Божия и отчаянием обураемым, пастырю добрый Иоанне, сих же кротостию и смиренномудрием покорив Христу, научил еси благодарно зывати тебе таковая: Радуйся, сущих во тьме и сени смертной премудрый просветителю; Радуйся, о спасении людей, в пучине греховней обураемых, благостный попечителю; Радуйся, неведущих Бога и окамененных сердцем к покаянию пробуждая; Радуйся, Божественною премудростию в писаниях твоих нас озаряя; Радуйся, сердец строптивых и злонравных благостное умягчение; Радуйся, ленивых и коснеющих совестию щедролубивое обличение; Радуйся, Слова Божия и правды Его проповедниче неустрашимый; Радуйся, Иоанне, земли Российския молитвенниче предивный.

### **Кондак 4**

Бурю злонравия воздвигаему на Церковь нашу Святую ведал еси, отче Иоанне, яко верный страж дома Господня, научал еси овцы Христовы бдети и право ходити в истинней вере и в заповедях Господних непорочно пребывати, да чистым сердцем и устами непрестанно зывают к Богу победную песнь: Аллилуиа.

### **Икос 4**

Слышаще о тебе, яко ты еси сосуд избранный и благодатных даров преисполненный, подвигов милосердия и нищелюбия ревнитель, вдов

сирот, страждущих и обремененных утешитель и о нераскаянных грешницах молитвенник слезный, не токмо от Кронштадта, но и от всех конец земли потекоша к тебе людие Божии, исцеления от тебе получаху. С ними же и мы гресех своих кающесе, яко ходатаю о нас пред Богом теплу, умильно зовем ти: Радуйся, сеятелю правды, слезами твоими землю нашу освятивый; Радуйся, обличителю неправды, души верных от прелести греховныя свободивый; Радуйся, свете сердец кротких и разумных, путь к Богу указуй; Радуйся, ученьми твоими, яко кормилица кроткая нас греяй и питай; Радуйся, всех скорбящих и обремененных неложное упование; Радуйся, болящих и от духов злых страждущих благодатное врачевание; Радуйся, сосуде избранный, дары Духа Святого туне верным источивый; Радуйся, не о людях токмо, но и о скотех милосердовавый; Радуйся, Иоанне, земли Российския молитвенниче предивный.

### **Кондак 5**

Яко небосветлая звезда священнолепным житием твоим просиял еси, пастырю Христов Иоанне! Богом дарованное тебе наследие от волков, губящих е, словом Божиим ограждал еси, пастырски взывая: возьмите Крест Господень, на Немже Христос — Царь славы — рукописание грехов наших изглади, в Нем же миру востание во веки. Мы же, сим знаменующесе, поем с тобою Бога победную песнь: Аллилуиа.

### **Икос 5**

Видевше тя Российстии людие дивно на свещнице церковной сияюща, правды Божия ищуще, к тебе притекаху, и яко другу Христову, исповедаху грехи своя. Мы же, обремененнии многими прегрешениями, к тебе, блаженне Иоанне, прибегаем и тако глаголем: Радуйся, яко силою благодати, яже в тебе, немощнии духом в любви Божии укрепляются; Радуйся, яко твоими молитвами кающесе плена греховнаго свободяются; Радуйся, яко труды твоими алчущии и жаждаущии Правды Христовой насыщаются; Радуйся, яко благовестием твоим врази Христовы посрамляются; Радуйся, яко молитвами твоими силы ада содрагаются; Радуйся, яко воздеянием рук твоих врата небесная верным отверзаются; Радуйся, в умилоствление за народ наш молитву, яко кадило благовонное, херувимски Богу приносивый; Радуйся, за неведующих правды и любве Божия молитися нас подвигнувый; Радуйся, Иоанне, земли Российския молитвенниче предивный.

### **Кондак 6**

Проповедницы чудных деяний твоих, блаженне Иоанне, явишася мнози: богатии и нищии, старцы и юноши. Ты бо всем Любовь свою изливал еси. Темже не токмо православнии, но и иноверии силою молитв твоих милость Божию обретаху, поя Богу: Аллилуиа.

### Икос 6

Возсиял еси житием твоим в Церкви Православней лучезарнее сияния севернаго, светом Евангелия Христова Отечество наше просвещал и от сетей вражиих чада ея ограждал. Тем же и ныне молим Господа сил, да любовь святая утвердится в сердцах наших, во еже ни скорбь, ни теснота, ни смерть не возмогут нас разлучить от любви Божия. И тако достигше сего, тебе воззовем: Радуйся, яко Божиим смирением грядущая на ны предвозвестивый; Радуйся, тесным путем в заповедях Божиих ходити нас научивый; Радуйся, в скорбех и печалех сущим источник радости в Бозе указавый; Радуйся, оную радость, яко зеницу ока, свято хранити нам завещавый; Радуйся, десницею и шуйцею оружие Правды Божия содержаый; Радуйся, в словесе истины и любви нелицемерней Сыну Громову уподобивыйся; Радуйся, порфирию покаяния всех облакаяй; Радуйся, диадимую благодати славно увенчанный; Радуйся, Иоанне, земли Российския молитвенниче предивный.

### Кондак 7

Хотя Всеблагий Господь спасти люди земли нашея и, яко злато в горниле огненнем, очистити я, вложи в уста твоя, всеблаженне, дух премудрости и разум провидца, во еже чрез покаяние сердечное и сокрушение слезное преуготовати я в вере непоколебимых к жертвенному служению, да со всеми святыми, в земле Российской просиявшими, ангельски вопиют Богу: Аллилуиа.

### Икос 7

Новаго избранника Божия, всеблаженне Иоанне, видяще тя у Алтаря Господня за всех молитвою слезною Христу сраспинающаяся, боголюбивии людие с верою к тебе притекаху и душевне и телесне исцеляхуся. Темже и мы, в немощи сущии, молим тя прилежно: воздвигни руке твои и не премолчи за ны ко Господу, якоже отец о чадах своих, да умножит Господь милость Свою на нас, приносящих ти сицевая: Радуйся, у Престола Божия прилежный о нас печальниче и ходатаю; Радуйся, покаяния слезнаго усердный глашатаю; Радуйся, образе неусыпнаго делания, Христу Богу работати прилежно нас наставляеши; Радуйся, яко на божественней страже веры апостольския стояти нас утверждаеши; Радуйся, образ воздержания и целомудрия добре показавый; Радуйся, суеверия, ереси и злохуления от стада

твоего отсекавый; Радуйся, сущих во тьме неведения славный просветителю; Радуйся, душ человеческих от суеты житейския мудрый восхитителю; Радуйся, Иоанне, земли Российския молитвенниче предивный.

### **Кондак 8**

Странное чудо видим на тебе, предивный пастырю Христов Иоанне! Сама бо Пречистая Матерь Божия ублажити тя и последующих тебе и с радости благоволение Божие всем возвести: о милейшия вы чада, Отца Небеснаго! Сице бо радость Церкви Небесныя о подвизе земныя предвозвести. Сего ради мы, надеждою на предстательство о нас Матери Господа Сил согреваемы, вопием Царю всех веков: Аллилуиа.

### **Икос 8**

Весь желанием Божиим распалеем, носитель любви Христовы явился еси, пастырю добрый. В ней бо милость и истина сретостеся, правда и мир облобызастеся; всякая же лесь упразднися, еретическое же злонравие, яко тля, попалися, скорби же человеческая елеем милосердия твоего утолишася. Мы же, нерадивии, сокровищ сих не стяжахом, праведным судом Божиим многим скорбем и печалем достойни явихомся. Но, ведуща тя помощника неусыпна, умильно зовем ти: Радуйся, любве Христовой неутомимый носителю; Радуйся, мира и правды ревностный сеятелю; Радуйся, веры православныя незыблемый хранителю; Радуйся, благочестия и добронравия насадителю; Радуйся, о всем мире печальниче и слезный молитвенниче; Радуйся, Церкви Христовой немеркнуший светильниче; Радуйся, отцев наших похвало, нам же надеждо и утешение; Радуйся, Богоизбранный пастырю, Святыя Руси благодатное украшение; Радуйся, Иоанне, земли Российския молитвенниче предивный.

### **Кондак 9**

Всем сущим в бедах и скорбех житейских воздвиже Господь на радость пастыря и чудотворца предивна Иоанна, да хромыя и расслабленныя, слепыя и от духов злых томимыя исцелит, в пагубнем пьянстве и супружестей неверности растлеваемыя к непостыдней жизни призовет, а яже во озлоблении сущия к Богу приведет и сице в душах верных царство Правды Божия насадит, да воспоем вси спасительную песнь Богу: Аллилуиа.

### **Икос 9**

Вития многовещании недоумеют изъяснити силу молитвы твоя, Иоанне предивне, егда три юноши, дерзнувших поглумитися о тебе и молитве твоей, спасительне наказал еси. Узрев же я кающихся и

слезно молящихся, исцеление злохулителю от Бога испросил еси. Тии же, познавше молитвы твоя силу чудодейственную и любви твоея милосердие теплейшее, яко Божия провидица, ублажиша тя похвалами таковыми: Радуйся, благое икономство чина своего богомудренно соблюдый; Радуйся, данный тебе залог, Тело Христово, цел и невредим до последнего твоего издыхания сохранивый; Радуйся, скрижали Богоначертанныя обою Заветов достойне возвестивый; Радуйся, Церковь Христову благочестием пастыря добра прославивый; Радуйся, истиннаго просвещения и христианскаго благочестия ревностный насадителю; Радуйся, кающихся грешников, сирых и убогих милостивый покровителю; Радуйся, мудрый путеводителю, стези правды юным указуяй; Радуйся, судие нелицеприятный, зло-мудрствующия любовию наказуяй; Радуйся, Иоанне, земли Российския молитвенниче предивный.

### **Кондак 10**

Спасти хотя души ближних своих, ересьми и маловерием обуреваемая, противу кознем диавольским воздержанием и смирением вооружился еси, отче Иоанне, апостольское и святоотеческое веры исповедание твердо сохранив. Жертвенною же любовию Христу сраспинайся, душу твою за спасение народа Божия положив, Царствия Небеснаго достигл еси, идеже со Ангелы и лики святых непрестанно Бога Славословия, поминай нас, славную память твою празднующих и поющих Богу: Аллилуиа.

### **Икос 10**

Стена твердая бысть любовь твоя ко Господу, в ней же утвердися сердце твое, богоносне, отче Иоанне. Сего ради всем притекающим к тебе с верою прибежище и утверждение явился еси, да всяческая Христу приобрящеша. Темже и нам, к тебе припадающим, буди стена крепка и ограждение непреодолимое, да не посмеются о нас, хотящая нам злая, во еже в мире и любви Христове пребывати и приносить сия похвалы: Радуйся, святильниче неугасимый, огнем Духа Святого возжженный; Радуйся, крине, присно благоухаяй, росою благодати Божия напоенный; Радуйся, росо сладкоплодная, благодатными дары верных ожитворяющая; Радуйся, доле земли, от греховнаго тления нас сохраняющая; Радуйся, в мире житейском обуреваемым тихое пристанище; Радуйся, яко душевне и телесне изенемогающим о помощи Божией умоляеши; Радуйся, сердцеведче предивне, верныя от лжемудрствования ограждай; Радуйся, силою молитвы чистыя союз супружеския верности укрепляй; Радуйся, Иоанне, земли Российския молитвенниче предивный.

### **Кондак 11**

Песнь достохвальную приносим ти, всеблаженне отче Иоанне, всем житием твоим прославившему Бога. И якоже видехом тя на земли долу у Престола Господня за всех и за вся Владыку мира умолявшего, сице и ныне на Небеси горе вознеси молитвы твоя, во еже непоколебимей быти Церкви нашей, да из рода в род в отечестве нашем благочестно славится Имя Троидинаго Бога поющими Ему: Аллилуиа.

### **Икос 11**

Светозарную свещу, во мраце жития сущим, зрим тя, Богом избранне отче Иоанне, ты бо на Небесех у Престола Божия в сонме святых и Сил Небесных о нас присно ходатайствуеши, воззри на нас, чад твоих, облегчи наша скорби и исцели наша недуги, да зовем ти: Радуйся, яко в подвизе твоём имя Пресвятыя Троицы дивно прославися; Радуйся, яко благочестием веры твоя Церковь Христова украсися; Радуйся, яко состраданием к ближним твоим скорби и болезни, и печали всяческия утоляются; Радуйся, яко молитвами твоими кающися грешницы Царствию Небесному приуготовляются; Радуйся, спасительных благ земных и небесных щедрый подателю; Радуйся, от враг видимых и невидимых надежный избавителю; Радуйся, яко в земном Едеме, Церкви Христовой, подвигом добрым просиял еси; Радуйся, яко доброты райская, уготованная праведным, восприял еси; Радуйся, Иоанне, земли Российския молитвенниче предивный.

### **Кондак 12**

Благодатных даров Духа Святого кладезь преполненный яви в тебе Господь, отче наш Иоанне, да с тобою и мы сих причастницы будем и тако познаем милость Божию к нам, яко не отступит, ниже посрамит нас Господь, егда благодарными усты и чистым сердцем, уповающе на милость благоутробия Его, воспоем Ему: Аллилуиа.

### **Икос 12**

Поюще твое достохвальное житие на земли и славу, юже стяжал еси на Небеси, молим тя, блаженне Иоанне, вознеси о нас молитвы Богу, да помиловани будем в день судный и, спасаеми твоими молитвами, тако тебе воззовем: Радуйся, богоизбранно и богопрославленне пастырю земли Российская; Радуйся, яко воспел еси имя Божие, аки орган мусикийский; Радуйся, пророком и апостолом добре поревновавый; Радуйся, бежати гнева Божия и творити плоды покаяния мудре наставивый; Радуйся, об Отечестве и народе нашем теплый молитвенниче; Радуйся, веры православный истинный

исповедниче; Радуйся, пресветлый лучу, путь к жизни вечней исиявая; Радуйся, неисчерпаемую благодать Божию нам открывая; Радуйся, трапезо неоскудеваемая, от неяже монаси и мирстии питаются; Радуйся, учителю Правды Божия, еюже старцы и юноши украшаются; Радуйся, яко ихже даде тебе Господь, сотворил еси я Богу в радование; Радуйся, яко от небожителей приял еси о Господе целование; Радуйся, Иоанне, земли Российския молитвенниче предивный.

### **Кондак 13**

О всеблаженне отче Иоанне, всероссийский пресветлый светильниче и предивный чудотворче! Приими хвалебное сие пение и умоли Христа Бога в мире и благочестии утвердити Святую Церковь, нас же всяких бед избавити и в единомыслии веры в союзе любви Христовы соблюсти, да единими усты и едином сердцем воспоем с тобою Богу: Аллилуиа.

(Этот кондак читается трижды, затем икос 1 и кондак 1)

### **Акафист второй**

#### **Кондак 1**

Избранному во иереях, дивному угоднику Божию Иоанну, пастырю и учителю, царей любителю, скорбных утешителю, земли Российской светлому светильнику, все житие свое на служение Богу и ближним посвятившему и множество грешников на покаяние обратившему; многим же болящим исцеление у Бога испросившему, составим хвалу, яко ходатаю нашему и скорому помощнику. Ты же, отче, яко имея дерзновение ко Господу, от всяких нас бед свободдай, да зовем ти хвалебно: Радуйся, Иоанне, новый Российский светильниче и теплый о нас к Богу молитвенниче.

#### **Икос 1**

Ангела-хранителя своего, еще шестилетен сый, в светлости неизреченной яв узрел еси, Иоанне, иже и рече тебе, яко по повелению Господню всегда невидимо соприсутствует и хранит тя от всех зол. Темже от юности избранника Божия тя ведуще, взываем сице: Радуйся, от младенства по предуведению Богом избранный; Радуйся, от юности в служении Ему Того благодатию призванный. Радуйся, ангела-хранителя твоего из детства добрыми нравами веселивый; Радуйся, николиже того чем опечаливый. Радуйся, яко незримый хранитель твой яве тебе явился; Радуйся, яко той всегда хранити тя обещася. Радуйся, благочестивых родителей чадо возлюбленное; Радуйся, теми из детска в страхе Божиим воспитанный. Радуйся,



воздержанию от юности себе обучивый; Радуйся, во убожестве и нищете младые дни своя препроводивый. Радуйся, яко благодать Божия яве на тебе почиваше; Радуйся, яко та лице твое всегда благоумиленно творяше. Радуйся, Иоанне, новый Российский светильниче и теплый о нас к Богу молитвенниче.

### **Кондак 2**

Видим тя, богомудре Иоанне, от юна возрасти благодатию Божиею осенена бывша и ею таинственно на добродетельное житие наставляема и руководима. Темже, имуще тя себе во образе и подражание, умильно вопием Христу Богу: Аллилуиа.

### **Икос 2**

Разум твой из млада в чтение и разумение священного и святоотеческаго Писания углубил еси, Иоанне, и из него, яко губа, воспринимал еси воду живу, от источника Святаго Духа проистекающую. Темже молим тя, умоли благаго Господа, да сподобит причастниками быти сея живительныя струи и нас, взывающих ти сице:

Радуйся, от младенчества чиста себе от страстей соблюдый; Радуйся, благодать святаго крещения целу и невредиму сохранивый. Радуйся, чтение Божественных писаний усердно возлюбивый; Радуйся, сокровенный в них смысл право и добре уразумевай. Радуйся, во учении книжном прилежание примерное показавый; Радуйся, в любомудрии естественном и духовном славно преуспевый. Радуйся, любомудрием твоим мира прелести скоро распознавай; Радуйся, тех сетей, яко орел высокопарный, мудре избежавый. Радуйся, северныя Российския страны чудное и светлое воспитание; Радуйся, мрака греховнаго в людех разгнание. Радуйся, всем притекающим к тебе скорое вспоможение подавая; Радуйся, многомощное нам пред Богом заступление являя. Радуйся, Иоанне, новый Российский светильниче и теплый о нас к Богу молитвенниче.

### **Кондак 3**

Сила благодати Божия, недостающая восполняющая, обильно излилася на тя, Иоанне приснопамятне, егда от святителя Христофора во иереа рукоположен был еси и граду Кронштадту пастырь учинен; оттоле бо начал еси учити люди верно служить Святой Троице и пети Ей: Аллилуиа.

### **Икос 3**

Имея любовь Божественную в сердце своем, мудре Иоанне, и устав поста строго соблюдая, удобь поборал еси страстей двизания,

николиже теми запявся. Темнее, яко муж силен, изшел еси на делание нивы Господни; словом, яко ралом, разрыхляя отвердевшая и оляденевшая сердца человеческая, согревая же та молитвою и теплотою любви твоея и насевая в них семена искреннего покаяния и живыя веры. Сего ради восписуем ти таковыя похвалы: Радуйся, избранный сосуде Божия благодати; Радуйся, даров небесных вместилище. Радуйся, всем сердцем и всем помышлением твоим Бога возлюбивый; Радуйся, сего ради и чада твоя духовная искренне Того любити учивый. Радуйся, заповеди Божия и уставы Церкви о постех опасно хранивший; Радуйся, таковым хранением любовь твою к Богу и ближним дела проявивый. Радуйся, от юности над страстями воцаривыйся; Радуйся, славен победитель над теми явивыйся. Радуйся, в мире поживый премирно; Радуйся, на земли мудрствовавый небесно. Радуйся, царства православно-российскаго столпе неподвижимый; Радуйся, православия и добрых обычаев блюстителю непозыблемый. Радуйся, Иоанне, новый Российский светильниче и теплый о нас к Богу молитвенниче.

#### **Кондак 4**

Бурею многих бед и волнений житейских одержимым, нам помогай, отче Иоанне, якоже и в животе твоём помогал еси всем, с верою к тебе притекавшим, да вси тобою вспомооществуем, благодарно о тебе поем Богу: Аллилуиа.

#### **Икос 4**

Слышав апостола глаголюща: «наше житие на небесех есть» и хотя е наследовати, маловременное сие житие не во угождении плоти и работе страстем иждил еси, Иоанне, но во очищении души от скверн греховных (с ними же никтоже может внити в Царствие Небесное). Темже имуща ты во образ богоугоднаго жития и помощника в сем, взываем сице: Радуйся, света евангельскаго в наши дни светлое блистание; Радуйся, омраченных душ вседейственное просвещение. Радуйся, яко в Божественная писания весь ум твой углубил еси; Радуйся, яко в них стезю правую в Царствие Небесное обрел еси. Радуйся, яко вся деяния твоя свет миру быша; Радуйся, яко тобою Отец Небесный дивно прославися. Радуйся, яко слово твое не бе, якоже кимвал бряцающий, мертво, нечувственно; Радуйся, яко тое быше воистину живо и действенно. Радуйся, яко тобою мертвии духом верою оживляются; Радуйся, яко тобою падшии в бездну греховную к покаянию возбуждаются. Радуйся, яко тебе во дни наши яви Господь земли Российстей яко пророка и апостола; Радуйся, яко в тебе врази истины обретоша неустрашимаго обличителя и крепкаго противоборца. Радуйся, Иоанне, новый Российский светильниче и теплый о нас к Богу молитвенниче.

### **Кондак 5**

Звезда многосветлая земли Российския явился еси, священне Иоанне, мрак греховный просвещающая. Темже и ныне подаждь просвещение сыном Российским, тьмою заблуждения объятим и во власть нечестивых предававшихся, да познают свое окаянство, и обратившися ко Господу, в покаянии возопиют Ему: Аллилуиа.

### **Икос 5**

Видевши Российстии народи великаго тя благочестия проповедника и многомошна пред Богом молитвенника и предстателя, во множестве отовсюду к тебе притекаху, инии же писания своя тебе, отче, посылаху, исцеления в болезнях, совета в недоумениях и утешения в скорбех просяще, и уллучивше желание, благодарственно тебе взываху: Радуйся, Иоанне, новый миру светильниче; Радуйся, непосредственный в молитвах Богу собеседниче. Радуйся, яко твоя молитвы сильны и многомошны Владыку умилоствляти; Радуйся, яко твое к Нему предстательство многодейственно благодать Его на щедродательство подвизати. Радуйся, яко тобою, по мере веры, подаются благодатная исцеления; Радуйся, яко тобою недугующие приемлют скорое недугов своих в здравие пременение. Радуйся, яко тобою грешнии на покаяние обращаются; Радуйся, яко тобою безчиннии крамольницы вразумляются. Радуйся, яко тобою безумнии глумители над тайнами веры посрамляются; Радуйся, яко тобою посмеятели чудесных твоих деяний подобающее вразумление приемлют. Радуйся, скорбящих благодатный утешителю; Радуйся, в недоумении сущих благодатный вразумителю. Радуйся, Иоанне, новый Российский светильниче и теплый о нас к Богу молитвенниче.

### **Кондак 6**

Проповедником истины, богоносным отцем подражая, всего себе на служение Богу и ближним вдал еси, и сан священства нося, покоя не знал еси, службы Божия в храме присно совершая и в домех верных молебная пения воспевая, нуждающимся же щедро благотворя, наименование благотворца и безсребренника стяжал еси, Иоанне. Темже и по успении твоём Российстии люди прославляют имя твое, и вечную память тебе возглашающе, поют Богу: Аллилуиа.

### **Икос 6**

Возсиявый от Девы Христос Бог наш и тьму идолюбесия светом Евангелия разгнавый, яви тя, отче Иоанне, верна и ревностна проповедника Своя истины, клеветами лукаваго извращаемыя. Темже, яко имеяй дерзновение ко Господу, избави от тех злобы и коварства всех воспевающих ти таковая: Радуйся, служителю Христов

изрядный; Радуйся, во иереех угодниче Того преизящный. Радуйся, на стражи дома Божия недремленно стоявый; Радуйся, татей духовных мечем слова Божия и молитвою отгонявый. Радуйся, писаньми твоими многих от любве мирския к любви Христове подвигнувый; Радуйся, вещаньми твоими любовь Божию к человеку, во искуплении и промышленности нам явленную, изъявивый. Радуйся, действие Духа Божия на сердца человеческая удобопостижно сказавый; Радуйся, тайну молитвеннаго с Богом собеседования яве указавый. Радуйся, целомудрие в законном супружестве твоём чудесно сохранивый; Радуйся, многая чада духовная покаянием породивый. Радуйся, в сердцах верных благовую память по себе оставивый; Радуйся, яко память сия, яко праведника, незабвенна пребудет во веки. Радуйся, Иоанне, новый Российский светильниче и теплый о нас к Богу молитвенниче.

### Кондак 7

Хотя Всеблагий Господь утешити верныя люди Своя и отвратити беззаконныя от злых дел их, воздвиже тя, Иоанне, якоже пророка Иону Ниневии граду великому; да проповеси Россияном гнев Божий, грядущий на ны вскоре, еже и собудутся уже по твоему вещанию, ибо непокаяни в гордыни пребыхом и не восхотехом с тобою смиренно пети Христу Богу: Аллилуиа.

### Икос 7

Нова беда и гнев Божий постиже нас, не восхотевших внимати богодухновенным твоим глаголом: держава бо царства нашего разрушися и слугам сатаны во власть предадеся, иже честныя обители иноческия разориша. святыя храмы оскверниша и вся благочестивыя люди люте озлобиша, и множество духовнаго и мирскаго чина мученической смерти предаша. Темже к тебе, отче Иоанне, в покаянии прибегаем и умильно взываем: умоли Владыку Христа, да преложит гнев Свой на милость и да услышит нас, взывающих ти сице: Радуйся, покаяния велегласный проповедниче; Радуйся, грядущаго гнева Божия на люди согрешившия неложный провозвестниче. Радуйся, нечестия людского громогласный обличителю; Радуйся, о исправлении тех ревностный рачителю. Радуйся, царства православно-российскаго при животе твоём крепкий оплот бывый; Радуйся, от крамол во дни оны тое сохранивый. Радуйся, царей благочестивых присный любимиче; Радуйся, мудрый тех советниче и наставниче. Радуйся, о власти царстей, яко богоуоставленной, многая словеса провещаваый; Радуйся, к послушанию и верности законной той власти люди тщаливо приводяй. Радуйся, молитвами твоими престолы царей благочестивых ограждай;

Радуйся, суды правы в людех творити тех поучаяй. Радуйся, Иоанне, новый Российский светильниче и теплый о нас к Богу молитвенниче.

### **Кондак 8**

Странный и необычный путь жития совершил еси, отче Иоанне, в мире пожив примерно и на земли небесно: в воздержании и целомудрии, и во всегдашнем Бога славословии великим отцем подражал еси. С ними же ныне на небеси Христу в веселии предстоя и молитвы о мире принося, выну поеши: Аллилуиа.

### **Икос 8**

Вси православнии людие, якоже в животе, тако и по преставлении твоём к Богу, вельми чтут тя, отче Иоанне, верующие, яко велие дерзновение к Богу имаши и молиши благодать Его о всех к тебе притекающих и тако взывающих: Радуйся, благаго корене доброе прозябение; Радуйся, отца клирика и матере благочестивыя рождение и воспитание. Радуйся, яко малая весь Сура твоего ради в ней рождения и воспитания всей земли Российской ведома сотворися; Радуйся, яко град Кронштадт твоим в нем служением прославися. Радуйся, яко милосердными делы твоими вся земля Российская наполнися; Радуйся, яко весть о чуднем и святем житии твоём и за пределы ея распространися. Радуйся, яко писаньми твоими тайна благодатнаго с Богом общения изъясняется; Радуйся, яко сими писаньми свет духовнаго озарения в сердца чтущих я изливается. Радуйся, яко в писаниих твоих чистота души твоя яве прозревается; Радуйся, яко в них, якоже в зеркале, богоподобие души человеческия отображается. Радуйся, яко писаниями твоими не токмо россияне, но инороднии народы во спасение свое назидаются; Радуйся, яко ими истинная вера возсиявает и мраки ересей разгоняются. Радуйся, Иоанне, новый Российский светильниче и теплый о нас к Богу молитвенниче.

### **Кондак 9**

Всякое слово не довлеет к похвале твоей, отче Иоанне, ты бо Духом Святым движим, от юности Богу усердно послужил еси; перее в изучении священных писаний многа лета усердно труждаяся и разум глубок стяжевая, также о научении отроков и о пастве твоей прилежно пекийся, всех поучал еси разумно пети Богу: Аллилуиа.

### **Икос 9**

Вития суемудрый, Лев безумный и единомысленницы его, тобою, отче Иоанне, яве посрамишася в злочестии своем, православнии же в вере утвердишася, боговещанными твоими глаголы наставляеми.

Темже, восхваляюще тя, взываем сице: Радуйся, цевнице боговещанная; Радуйся, гусли Духа сладкозвучная Радуйся, словесы и писаньми твоими догматы веры уяснивый; Радуйся, вещаньми твоими верных смыслы в православии утвердивый. Радуйся, яко тобою полки богоборцев победишася; Радуйся, яко тобою яснополянский богоотступник и клеветы его мудро изблочишася. Радуйся, яко тобою душепагубное того учение о душе человечестей, аки бы не имеющей личного бытия, низложися; Радуйся, яко тобою истинное учение о бессмертии и лично безконечном пребывании ея утвердися. Радуйся, разума Божественного мудрый изъяснителю; Радуйся, таинств церковных благоговейный совершителю. Радуйся, благонадежный в Царствие Небесное руководителю; Радуйся, пути спасительного истинный учителю. Радуйся, Иоанне, новый Российский светильниче и теплый о нас к Богу молитвенниче.

### **Кондак 10**

Спасти хотя душу твою, многих святых добродетели в себе совокупил еси, отче Иоанне: апостольское и святоотеческое веры исповедание, мученическую в благочестии твердость, всегдашнее в молитвах бодрствование, воздержание и смирение, в купе же и подвиги преподобных. Темже ныне со святыми на небеси водворяяся и непрестанно Бога славословя, поминай нас, славную память твою почитающих и поющих Богу: Аллилуиа.

### **Икос 10**

Царя Небесного усердный священнослужителю и земных благочестивых царей верный чителю и любителю, отче Иоанне; обоим праведно благоугодивый, воздая кесарево кесареви и Божию Богу, и вся люди тому же поучал еси. Сего ради восхваляем тя и глаголем сице: Радуйся, рабе Божий, благий и верный; Радуйся, служителю Того усердный. Радуйся, вся повеленная от Господа тщательно творивый; Радуйся, заповедей Его искусный делатель бывый. Радуйся, о вездесущии Божии всегда помышлявый; Радуйся, умным очесем твоим Того выну представлявый. Радуйся, благочестивых царей российских, яко слуг Божиих, почитавый; Радуйся, благими советами и молитвами твоими в трудном их подвиге народоправления помогавый. Радуйся, к попечению о благе Церкви и народа своего тех подвизавый; Радуйся, от крамол и мятежей в животе твоём тех защищавый. Радуйся, и ныне о царстве православно-российском Бога умоляя; Радуйся, скиптры царей православных утверждая. Радуйся, Иоанне, новый Российский светильниче и теплый о нас к Богу молитвенниче.

### **Кондак 11**

Песней похвалою невозможно есть изобразити множество о Бозе исправлений твоих, о пречудне отче Иоанне; яже совершил еси во всем житии твоём; немощныя молитвами твоими исцеляя, бесы от человек изгоняя, пьянством и иными страстьми недуговавшийя врачуя, в нищете же и убожестве сущия обильно ущедряя, и всем по коегождо потребе помогая и благотворя, яко всем благодарно о тебе пети Богу: Аллилуиа.

### **Икос 11**

Светильника светла и прозорливца дивна яви тя Господь в днех наших, провозвестивша грядущий гнев Его на царство православно-российское, зане не покаяхомся проповедию твоюю. Темже, яко пророка Божия и провозвестника Того судеб, ублажаем тя и в покаянии взываем: Радуйся, провидче дивный; Радуйся, будущих событий предсказателю неложный. Радуйся, древним покаяния проповедником равный; Радуйся, новым провидцем равностепенный. Радуйся, сокровенных судеб Божиих яснозрителю; Радуйся, грядущаго гнева Божия на нераскаянные грешники возвестителю. Радуйся, покаяния сладкогласный глашателю; Радуйся, смятенных сердец умирителю. Радуйся, многомогущый наш пред Богом ходатаю; Радуйся, благонадежный наш пред Ним предстателю. Радуйся, добрый словесных овец пастырю, множество заблудших душ разыскавый; Радуйся, от уз темничных и смерти многих свободивый. Радуйся, Иоанне, новый Российский светильниче и теплый о нас к Богу молитвенниче.

### **Кондак 12**

Благодать Божия, юже приял еси сугубо во святом крещении и во иерейском рукоположении, не вотще в тебе бысть, отче Иоанне: рачением бо твоим употребил еси сию на пользу многим и во славу Дарователя ея; светлостию бо жития твоего и дела милосердными вельми прославися Отец Небесный, и от множества уст, тобою духовно и телесно облагодетельствованных, возносится Тому великая песнь: Аллилуиа.

### **Икос 12**

Поющие богоугодное твое от юности житие и духовное от силы в силу восхождение, ублажаем праведную твою кончину и славное погребение благодатных твоих мощей, обретших вечный покой в созданной тобою девичей обители. Веруем же, яко и святая душа твоя упокоится в пресветлых райских селениях, ихже наследовати помози нам, возглашающим ти похвалы сицевыя: Радуйся, течение временныя жизни равно и богоугодно скончавый; Радуйся, веру правую

непорочно сохранивый. Радуйся, мирною христианскою кончиною праведность твою известивый; Радуйся, покой вечный на небеси со святыми получивый. Радуйся, радости праведных во обителях райских причастивыйся; Радуйся, со множеством душ, тобою спасение улучивших, блаженства вечнаго сподобивыйся. Радуйся, с царственными новомученики Царство Небесное наследивый; Радуйся, с ними Царю славы предстояй и о избавлении отечества нашего от безбожных враг молитвы возносяй. Радуйся, великий православия поборниче; Радуйся, непреодолимый благочестия защитниче. Радуйся, сонными явленьми преславно чудотворяй; Радуйся, инославныя в православие приводяй. Радуйся, Иоанне, новый Российский светильниче и теплый о нас к Богу молитвенниче.

### **Кондак 13**

О всечестный отче Иоанне, не Кронштадтский токмо, но и всероссийский, паче же — всемирный светильниче и великий Христов угодниче! Приими от нас недостойных хвалебное сие пение и благоприятными твоими ко Богу молитвами избави нас от бед временных и вечных, да сподобимся с тобою в Царствии Небеснем вечно воспевати: Аллилуиа.

(Этот кондак читается трижды, затем икос 1 и кондак 1)